

PUSAT PENGAJIAN KEJURUTERAAN AWAM UNIVERSITI TEKNOLOGI MARA CAWANGAN PULAU PINANG



CERITERA KELAS YANG HILANG: MADAM RINDU ZAMAN OHP

Faizah Kamarudin

OHP? Apa tu? Madam hanya mampu tersenyum bila pelajar bertanya. Mari kita selami perjalanan madam menongkah arus teknologi!

Segalanya bermula pada tahun 1999, hari pertama madam mengajar. Penuh semangat, tetapi ada satu masalah besar - OHP berat! Setiap minggu, madam terpaksa meminta wakil kelas untuk mengangkatnya. Itu baru cabaran pertama, hehe!

Mengajar dengan OHP bukan semudah letak helaian dan hanya bercakap. Madam perlukan plastik transparensi dan pen *marker* khas. Silap tulis? Nasib baik ada cecair *remover*, tapi kalau padam terlalu kerap, plastik jadi comot. Pelajar pun perlu menyalin nota satu per satu. Walaupun nampak 'leceh', mereka lebih fokus. Terbaik, kan?

Tapi ada juga situasi lucu. Pernah madam letak helaian terbalik, habis satu kelas membaca nota dalam keadaan *mirror effect*! "Madam, nota terbalik!" Aduh, malu!

Kemudian, muncul LCD projektor. Alhamdulillah, tak perlu angkut OHP! Dengan *PowerPoint*, madam boleh masukkan gambar dan animasi. Tapi, oh tidak! Sekarang pelajar malas menyalin nota. Dulu mereka aktif, sekarang hanya tunggu slaid dimuat naik.

Lalu datang era *e-learning*. Madam mula menggunakan *i-Learn* (sekarang dipanggil *UFUTURE*) untuk berkongsi nota. Mudah, cepat, dan tak perlu bawa *pendrive*. Namun, interaksi dalam kelas semakin berkurang. Dulu, madam bertanya soalan, sekarang pelajar ambil gambar dan senyap. Kadang terasa mereka ambil gambar madam pula. Opss!

Pandemik tiba, bilik kuliah 'hilang'. Kelas jadi Google Meet dan Zoom. "Madam, internet *slow*!" dan "*mic* saya rosak lah!" menjadi lagu baru. Diakhir kelas, semua ucap terima kasih secara berjemaah bagai ciapan burung-burung, padahal sepanjang kelas diam seribu bahasa. Mungkin mereka percaya, "Jika sekiranya diam itu bijak, lakukanlah!" Hahaha!

Madam mula rindu kelas fizikal. Rindu pelajar menyalin nota dan bertanya soalan secara langsung. Tetapi, pendidikan mesti diteruskan, walau dalam apa jua keadaan. Kita boleh!

Kini, kita berada di era AI. Madam boleh guna ChatGPT untuk menjana soalan kuiz dalam beberapa saat. Jeng jeng! Namun, tiada teknologi yang boleh menggantikan peranan seorang pendidik.

Madam tetap rindu zaman OHP, bukan kerana teknologinya, tetapi nilai pembelajaran yang lebih mendalam. Dulu risau transparensi comot, sekarang risau internet *hang*. Dulu minta wakil kelas angkat OHP, sekarang minta mereka '*mute*' mikrofon. Dulu, pelajar menyalin nota dengan penuh fokus, sekarang mereka *screenshot* nota dan terus simpan dalam telefon atau *tablet*.

Satu perkara tidak pernah berubah: keinginan untuk mendidik. Teknologi boleh berubah, tetapi jiwa seorang pendidik tetap sama. Terima kasih OHP, *PowerPoint*, dan AI. Tetapi madam percaya, manusia adalah guru terbaik untuk manusia lain!